

INUIT ATAQATIGIIT

INATSISARTUNI



UPA 2014/153

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunatsinni ilinniartinnit tamani ilinniartut pisariaqartitsineq naapertorlugu danskisut pikkorissarneqarnissamik periarfissinneqaqqullugit Ilinniartitaanermut Pilersaarutaat II-mut Naalackersuisunit qulakkeerneqaqqullugu Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Tungavilersuut

Ilinniartitaaneq tamatta pingaarteqaarput. Ilinniartitaanerup imminut pilersorsinnaaneq piviusunngortissavaa. Taamaammatt inuusuttut amerlanerpaat ilinniagaqqullugit inattarpagut.

Ilinniarusuttut matunik matoqqasunik naammattoorsissanngillat. Ilinniarnermik kipititsiinnarneq minnerpaaffianiitsinniarlugu aningaasarpasuit atorpagut, iluaqutaasumik.

Ilinniarusuttunilli mattussisarpugut! Tassalu danskisut pisinnaasakinnerit Nunatsinni ilinniartinnit iserneq ajorput, ilaatigut minnerpaamik danskisut karakter 6 angusimannikkunikkut ilinniarfinnit isersinnaasanninnamik. Tamatuma kinguneraa inuusuttut danskisut pisinnaasakitsut ilinniarsinnaannginnerat.

Tamanna eqqortuusinnaanngilaq. Assersuutigalugu maani sanasunngorniaq ilinniartimmatt iseqqusaanngitsoq danskisut karakterikippallaarmat Danmarkimut atuariartorsinnaavoq tassani danskisut karakter apeqqutaanngimmata.

Nunatsinni ilinniartinnit danskisut pisinnaasariaqarneq aallaaveqarnerartarparput ilinniartitsisut danskisut oqaasiliummata aammalu atuakkat ilinniutit danskisut allassimmammata.

Ilinniagaqarniartup ilinniartinnit toqqaraangamiuk taanna inuutissarsiuutiminnit aallaavigisarpaa. Ilinniakkami oqaasit ilikkakkat inuunermi tamarmi atorneqarsinnaanngortarput. Taamaammatt ilinniartinnit nammineq pisussaaffigisariaqarpaa ilinniartuutimi danskisut piginnaasaata qaffassarnissaat, soorlu aamma ilinniartitsissutini tamani qaffassaanissaq ilinniartinnit namminneq pisussaaffigisaraat.

Nunatsinni eqqortuusinnaanngilaq danskisut pisinnaalluurtut kisimik ilinniagaqartarnissaat. Danskisut killilimmik piginnaasaqaraanni ilinniartinnit ikiorneqarnissaq pisinnaatitaaffiusariaqarpoq.

Taamaalinikkut kalaallisuunerusoq oqaasilinnik ilinniagaqarusuttunik mattussissanngilagut.

Taamaammatt ilinniartinnit tamani ilinniartup pisariaqartippagu danskisut pikkorissarneqarnissamik periarfissinneqarnissaa Naalackersuisut Ilinniartitaanermut Pilersaarutaat II-mut ilanngunneqartariaqarpoq.

Pisortanut aningaasaqarnikkut allaffissornikkullu kingunissai.
Suliniutissat pilersarusiornerat aningaasartuutitaqassaaq. Ilinniartitaanermi pilersarusiap iluani aningaasartuutit nassaariniarneqassapput.

Namminersorlutik inuussutissarsiortunut aningaasaqarnikkut allaffissornikkullu kingunissai.

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunissai.

Innuttaasunut aningaasaqarnikkut allaffissornikkullu kinguneqassanngilaq.